

Penglibatan Bumiputera Dalam Ekonomi Negara Memuaskan - Muhyiddin Bernama
5 Februari, 2013

GEORGE TOWN, 5 Feb (Bernama) -- Timbalan Perdana Menteri Tan Sri Muhyiddin Yassin berkata walaupun penguasaan Bumiputera dalam bidang ekonomi negara ketika ini hanya 24 peratus tetapi ia sebenarnya dalam skala nilai yang besar jika dibandingkan dengan pencapaian beberapa tahun lepas.

Beliau berkata kerajaan sentiasa memikirkan langkah efektif bagi meningkatkan penyertaan Bumiputera dalam bidang ekonomi, sebagai contoh dengan menubuhkan Majlis Tindakan Agenda Bumiputera (MTAB).

"Kerajaan sentiasa mengambil inisiatif bagi melestarikan pencapaian Bumiputera dalam ekonomi di masa akan datang," katanya ketika menjawab soalan jurutera Jabatan Pengairan dan Saliran (JPS) Pulau Pinang Nasir Salleh dalam majlis dialog bersama profesional di Dewan Budaya, Universiti Sains Malaysia (USM) di sini Selasa.

Mengenai masalah perumahan di Pulau Pinang, Muhyiddin berkata kerajaan sedia menimbang cadangan penubuhan tabung perumahan bagi menyelesaikan masalah perumahan di negeri ini, dengan menggunakan mekanisme Lembaga Tabung Haji untuk membantu pendeposit menunaikan haji.

"Kita boleh fikirkan hal itu, tetapi sementara untuk menubuhkan tabung itu, kita perlu membina rumah-rumah mampu milik bagi membolehkan rakyat yang berpendapatan sederhana berpeluang memiliki rumah sendiri," katanya.

Mengenai isu keciciran pelajar lelaki dalam pelajaran, Muhyiddin yang juga Menteri Pelajaran berkata kerajaan komited melakukan transformasi pendidikan vokasional bagi menarik minat pelajar lelaki untuk mengoptimumkan potensi diri masing-masing selain daripada bidang akademik.

"Ini sedikit sebanyak dapat memberi mereka nilai tambah dari aspek kemahiran untuk pelajar lemah dan kurang minat dalam akademik. Di sekolah-sekolah kita telah memperkenalkan bidang vokasional pada tahap asas bagi permulaan sebelum mereka ke peringkat lebih tinggi," katanya.

Selain itu, Muhyiddin berkata kajian dan penyelidikan berterusan perlu dibuat bagi mendapatkan satu situasi menang-menang dalam mengatasi masalah pembangunan harta wakaf.

Katanya harta wakaf adalah khazanah boleh dimanfaatkan bagi penjanaan ekonomi umat Islam sekiranya ia tidak berdepan dengan pelbagai kekangan untuk dibangunkan.

"Dalam mengurus harta wakaf perlu ada penglibatan orang yang pakar dalam bidang agama, pembangunan harta wakaf ini seharusnya memberi manfaat kepada rakyat bagaimanapun masih banyak kajian perlu dijalankan untuk mengurangkan kekangan yang menghalang proses pembangunan harta wakaf," katanya.

-- BERNAMA

Source: <http://www.bernama.com/bernama/v6/bm/newsindex.php?id=926274>